

15/12/1997

MT bincang perletakan jawatan Ghapur

KUALA LUMPUR, Ahad - Majlis Tertinggi Umno akan membincangkan keputusan Timbalan Ketua Menteri Sabah, Datuk Abdul Ghapur Salleh, meletakkan semua jawatan dalam Kabinet negeri dan parti.

Timbalan Perdana Menteri, Datuk Seri Anwar Ibrahim, berkata MT Umno perlu membincangkan perkara itu terlebih dulu sebelum mengambil keputusan selanjutnya, termasuk menamakan penggantinya.

"Dia (Ghapur) beri alasan sebab peribadi. Kita akan bincang dengan pucuk pimpinan terlebih dulu, termasuk dengan Perdana Menteri bagi mengetahui kedudukan sebenar.

"Hanya selepas itu, baru kita tentukan tindakan selanjutnya," katanya yang juga Timbalan Presiden Umno kepada pemberita selepas merasmikan Karnival Sukan Untuk Semua (Kesuma) 1997 di Dataran Merdeka di sini, hari ini.

Ghapur yang juga Menteri Kewangan Sabah, mengumumkan keputusan mengejut itu di ibu pejabat Umno Bahagian Tawau, semalam. Peletakan jawatannya sebagai Timbalan Ketua Menteri dan Menteri Kewangan negeri akan berkuatkuasa 18 Disember ini.

Beliau yang dilantik menganggotai Kabinet Sabah selepas Barisan Nasional (BN) mengambil alih tampuk pemerintahan negeri pada Mac 1994, turut melepaskan jawatannya sebagai Timbalan Pengerusi Badan Perhubungan Umno Sabah, mulai semalam.

Ghapur adalah Timbalan Ketua Menteri yang dilantik pada 1995 mewakili Bumiputera Islam. Dua lagi Timbalan Ketua Menteri ialah Datuk Joseph Kurup yang mewakili Bumiputera bukan Islam dan Datuk Tham Nyip Shen mewakili kaum Cina.

Ketika memaklumkan peletakan jawatannya, Ghapur memberi alasan 'soal peribadi' sebagai faktor utama beliau mengambil keputusan itu.

Bagaimanapun, beliau memohon maaf kerana tidak memaklumkan kepada Perdana Menteri, Datuk Seri Dr Mahathir Mohamad, terlebih dulu mengenai keputusannya.

Sementara itu, di KOTA KINABALU, Pengerusi Badan Perhubungan Umno Sabah, Datuk Seri Panglima Osu Sukam, menyerahkan kepada Dr Mahathir selaku Presiden Umno untuk menentukan pengganti Ghapur dalam Kabinet negeri dan parti.

"Saya akan memaklumkan kepada Perdana Menteri (soal peletakan jawatan Ghapur) dan kita akan membuat keputusan kemudian," katanya ketika ditemui selepas mengadakan pertemuan dengan Ghapur di Likas, pagi ini.

Osu yang juga Menteri Tanah dan Pembangunan Koperasi menemui Ghapur di kediamannya (Ghapur) di Likas, dekat sini, selama setengah jam mulai jam 8.45 pagi.

Menurutnya, Ghapur sudah memberi penerangan dan penjelasan kepadanya berhubung keputusan peletakan jawatan itu.

Bagaimanapun, beliau tidak menyatakan penjelasan berkenaan kerana perlu menyampaikannya kepada Perdana Menteri terlebih dulu.

Terdahulu ketika ditemui pada majlis larian amal anjuran Parti Liberal Demokratik (LDP) di Padang Merdeka awal pagio ini, Osu berkata beliau dan pimpinan Umno negeri terkejut dengan tindakan Ghapur melepaskan jawatan Kabinet negeri dan parti.

"Bagaimanapun, apa juga yang berlaku dalam pucuk pimpinan negeri, itu satu perkara biasa. Kita akan terus melaksanakan tugas dan tanggungjawab. Beliau (Ghapur) sendiri sebagai Ketua Umno Bahagian Tawau akan terus

memainkan peranan untuk menentukan kekuatan Umno dan BN terus utuh dan kuat," katanya.

(END)